

Americanish Historie

BY

JOHANN KLOTZ

Illustrated with 32 Original Drawings

By Bill Wissbaum

Annville, Pa.

Journal Publishing Company

1905

Copyright by
JOURNAL PUBLISHING CO.
Annville, Pa.
1 9 0 5

VORREDE

FON die erschta zeita in historie hen die leit fon alle laender ihra kinner g'lernd wie ihra land en reich bekomma is, und fon ihra grosse helda.. Des hat helda aus die kinner g'macht.

So set es in America sei. Die buhva und maed missa die historie fon ihrem land wissa oder es is nix doh sie patriotisch zu macha. Die grosse patriots hen g'sehna das es noetig is so en buch wie des in die haend fon unser yunge leit zu duh, und nach dem das mei alte freind—der James Gordon Bennett, Rev. Parkhurst, und der James Witcombe Reily—der task uf mich g'forced hen, hab ich aw g'nomma es zu schreiva. Now doh schteht nix g'schrivva except was yeder schul buh wissa set fer en guter citizen aus ihm zu macha.

In der ferfassung diesem buch hat der Swinton, der Butler, und en schoe glae weibsmensch als schulteacher mir g'holfa etliche zwanzig yohr zurick. Eb ich es zum drucker

gevva hab, hab ich es zum Rev. Parkhurst g'schickt fer correction, so das nix gedruckt werd das net recht is. Er sagt es is alles recht, und duht es hoch recommenda.

Der Bill Wissbaum hat die picters g'macht das in dem buch sin. Er sagt das wann er dorrich sei alt schule buch guckt kumma die sacha so frish in sei gedanka als wann der schulemaester sie yuscht nei g'schlaga het. So kenna mir uns druf ferlossa das sie correct sin.

Fergess net das ich des land net g'macht hab und bin net responsible fer die thata unser forfaeter. Des is die historie fon eirem land, und wann es eich net suit is es net die schuld fom

FERFASSER.

Annville, Pa.

July, 1905.

INHALT

	SEITE
<i>Einleitung</i>	I

EPOCHE I

Entdeckungen

Der Columbus Entdeckt America .	7
Andere Entdeckungen.	12

EPOCHE II

Settlement

Virginia	19
Massachusetts	25
Rhode Island	31
Connecticut	33
New Hampshire	36
New York	38
Pennsylvania	42
New Jersey	45
Delaware	47
Maryland	48
North und South Carolina	51
Georgia	52

EPOCHE III

	SEITE
<i>Francosishen Greek</i>	
Koenig William's Greek	56
Koenigin Anne's Greek	57
Koenig George's Greek	57
Francosish und Insching Greek . .	57

*EPOCHE IV**Freiheits Greek*

Ursache der Greek	61
Der Greek und der Auskum	64

*EPOCHE V**Constitutional Government*

George Washington	71
John Adams	73
Thomas Jefferson	75
James Madison	75
James Monroe	78
John Quincy Adams	78
Andrew Jackson	80
Martin Van Buren	80
William Henry Harrison	80

INHALT

vii

SEITE

John Tyler	81
James K. Polk	81
Zachary Taylor	81
Millard Fillmore	83
Franklin Pierce	83
James Buchanan	83
Abraham Lincoln	84
Andrew Johnson	89
Ulysses S. Grant	90
Rutherford B. Hayes	90
James A. Garfield	91
Chester A. Arthur	91
Grover Cleveland	91
Benjamin Harrison	91
Grover Cleveland	93
William McKinley	95
Theodore Roosevelt	96

<i>Zum Beschluss</i>	97
--------------------------------	----

EINLEITUNG.

IM aufang hat Gott die welt erschaffen. Mir wissa net eb America sellie zeit in die welt war oder net, avver unser hochie professors saga das es war. Dael professors 'saga aw das Paradise, wo Adam und Eve g'woned hen war in dem land, und doh hat der sind fluth die leit ivvernomma und em Noah sei ark nivver g'nomma zu Asia wo en new sort leit uf g'wachsa is.

Now die leit hen sich nie bekimmert wie gross das die welt is. Es wora net so fiel leit und sie hen ennoner net rum schieva missa fer sich rum draea wie sie heit missa. Dort in Asia hen sie sich fermehrt bis sie gans Asia, Europe und Africa g'filkt hen. Noh hen sie ausgucka missa fer meh blatz.

Die leit in die Mittelzeiten wora in grosse dunkelheit und hen net fiel g'wist fon der welt weil die grosse professors das mir now hen noch net gebora wora. Sie hen net g'wisst das die welt rund is, und rollt in der luft rum. Sie hen g'maent sie is flat wie en blank. Die priester wora die aensige leit das en lerning g'hat hen,

und sie hen g'sad das die welt flat is, und der das sie contradict hat, hat sei kop ob g'hackt grickt.

Es war die fashion unnich die schiffleit zu sehna wer es weitscht fom land geh kann ohne ab falle ; und dael sin ordlich weit ganga. E' Englisher war so weit das er g'maent hat alle minut er fällt bald ob, und er is rum gedreht und is widder haem.

Sei erfahrung hat die scientists in sellem tag schtudya und denka g'macht, und sie hen en holvie notion grickt das die welt maecht rund sei, avver sie hen sich g'farricht so zu saga.

Die Norseleit sin weiter fon haem g'schiff wie die anre leit, und im yohr 983 is der Lief der Glicklich so weit rivver kumma bis an Rhode Island. Des land war schoe zu seiner auga, und er hat es Vinland g'haesa weil er g'maent hat das des der blatz is wo der alt Baccus als hie is fer en suff ab zu schlofa. Nach dem sin die Norseleit oft rivver kumma, avver die Insching hen sie all g'mord, so das wie der Columbus rivver kumma is wora ken Norseleit meh doh.

Es werd efters g'frogt wo die Insching haer kumma sin. Ich und niemand schunscht waes des, avver dael leit maena das wie die leit sich fermehrt hen in Asia nach em sind fluth sin e'

dael fon insel zu insel g'schwomma im South See bis sie rivver kumma sin an Cape Horn. Now hen sie sich g'farricht widder zurick zu schwimma und sin doh geblivva. Des is glaublich.



Die Norseleit im Bacchus seim Land

Ich hab en differente opinion. Ich und der Darwin agreea in dem. Er sagt uns das im aufang wie cosmos gleichartig is worra, hat entwicklung aug'fanga, aus welchem molecule g'wachsen sin, Molecule hen protoplasm

g'macht, und bald war alles licht. Wo licht is, is aw laeva, und als des licht g'wacksa is hat es plastisch zelle g'macht, fon welchem der



En Insching

primordial keim kumma is. Der primordial keim hat sich zu protogene gedreht; protogene hat sich zu eocene gedreht, und aus eocene is lewendich schtoff kumma. Die erschte lewendiche dinge wora die Simiads; die Simiads hen sich entwickelt in unnerschiedliche anthropomorphic primordials. Und doh is wo die Insching haer kumma sin.

Now, fom aüfang war es geordert das dael leit dumkep sei

sella, und anre sella schmaert sei, und die schmaerta sella die dumkep morda und die welt nemma. In dem sehna mir das die weisa leit en recht g'hat hen doh rivver kumma

und America zu nemma. Es war so geordert fom anfang.

Die welt hat lang g'wort fer en man fer der lead zu nemma die dumkep aus zu butza. Endlich, im yohr A. D. 1492, hat sie der recht man—der Christopher Columbus—g'funna. Er hat es bescht geduh das er hat kenna, avver sei job is noch net fertig.

Epoche I.—ENTDECKUNGEN

Der Christopher Columbus Macht Sei Theory
Bekannt und Gricht Hilf Fon Die Spanish
Koenigin — Er Entdeckt America — Andere
Entdeckungen

DER COLUMBUS ENTDECKT AMERICA

DIE leit im Alte Welt hen net g'wist das die
welt rund is und das noch en land weit
ivver em see leit. E' tag hen der Columbus und
e' paar anre kerls en argument g'hat wo die
sonn hie geht fer schlofa. Dael fon ihnen hen
contend das irgends en loch is das sie dorrich
schloopt und en onner loch wo sie widder raus
graddelt. Die map macher hen fergessa die
lecher maricka uf die maps so das niemand g'wist
hat wo sie sin.

Der Columbus hat contend das wann die sonn
in die ruh geht mus sie en bett hovva, und er
hat drei cent g'wet das irgends noch en land is
wo sei hie geht.

Die anre kerls hen des net geglaubt und hen die Koenigin Isabell dafon g'sad das der Columbus so en grosser lingner is. Die Isabell hat grad g'schickt fer der Columbus und er hat ihr alles gans klahr und deitlich g'macht. Wie er fertich war rede hat sie zu ihm g'sad, "Now Christofel, geh und entdeck des neu land und wann du es g'funna hascht, bring es mit haem; ferleicht kann ich es ferkaufa."

"Yah," sagt der Columbus, "des land leid ivver em see und ich hab ken schiff fer nivver geh."

Dann is die Isabell drah ganga und hat ihra goldiche watch und finger rings gepawned zum alte Isaac Schleifschtein, und hat drei schiff gekauft.

Der Columbus hat noh e' paar menner grickt fer mit geh, und sie sin ab g'schtaert. Die sonn is ihnen avver for kumma und is sellie nacht erscht an's neu land kumma. Der Columbus hat net g'wist das es so weit is, und er und sei schiffleit hen die zeit ferdrivva in die sonn um die welt yaga und karta schpiela.

Endlich sin die kerls des ding laedich worra und sie hen aus g'macht sie morda der Columbus und gehn haem wann sie net bald land erlanga. E' kerl is nuf zum Columbus und hat sei duwoch



Der Columbus B'sucht die Isabella

aus em maul, zurick gezoga, und g'sad, "Ich hab en notion dir der kop ab schmeissa."

Der Columbus war avver uf zu seiner tricks, und eb der kerl schmeisa hat kenna, hat er ihm uf die schtern g'schлага das sei tzae-negel ob g'fora sin. Nach dem war alles ruhig uf schiff-bord.

Endlich hen sie land g'schna un der naechst tag, der 12 October, 1492, sin sie augland uf en glae insel naechst zum grossa land. Wie der Columbus augland is hat er grad g'sad. "Im name des Spanish koenigreich is des land mei und der Isabella." Dann kummt en alter Insching fon hinner en baum und sagd, "Ich denk net. Ich hab en mortgage uf dael und du muscht mich erscht leddera eb sel grickscht." Des hat der Columbus e' wenning ferschrocka, avver er war grad willich freindlich zu sei. Sie hen mitnonner e' paar glessen bier gedrunka und der Columbus is noh fort.

Er hat e' paar anre inseln entdeckt und is nöh haem. Avver es land war zu gross, er hat es net mit nemma kenna. Wie er haem kumma is und hat des land net mit gebrocht hat die Isabell ihn g'frogt wo es land is. Er hat ihr g'sad es is zu gross fer mit bringa. Die Isabell hat ihn etliche mohl zurick g'schickt fer es schtickweis



Der Columbus Entdeckt America

bringa, avver alle mohl hen die Insching ihn es net nemma glost, und er is zurick ganga ohne.

Endlich hat der alt Schleifschtein sei gelt wella, und die Isabell war hart uf und hat net bezahla kenna weil der Columbus net des land mit gebrocht hat. Der Schleifschtein hat noh der Isabella ihra jewelry ferkauft an fuftzig procent ovvich em regular preis. Des hat die Isabell so ferzernt das sie der Columbus todt g'schlaga hat. Sie hat sei todter kerper nach America g'schickt zu fergrauva sei.

Der Columbus, so lang das er g'laebt hat, hat ken ehra g'hat fon der leit; avver now das er manche yohra todt is, ehra ihn alle leit. Er war en grosser man und war wirdich fiel ehra und en pension zu hovva.

ANDERE ENTDECKUNGEN

Nach dem das der Columbus haem kumma is fon sei erschte trip und hat alles kund g'macht was er g'sehna hat, is die gans welt bald narrisch worra. Fiel onre schiff-menner hen ihra glick broviera wella und e' wennig ehr und, ferleicht, en pension, ziega wella fon ihra government. Der Columbus war avver doch der erscht das main land erlangt hat; er hat Central America erlangt uf sei letschte trip do rivver.

Des land set Columbia haesa, nach em Columbus, avver im yohr 1494 is en Italian mit name Americus Vesputius rivver kumma und is in South America augland. Wie er haem kumma is und hat sei erfahrung ferzaelt hat en Deutscher en map fom land g'macht und hat es America g'haesa.

Grad nach dem das der Columbus des land g'funna hat, sin fiel Spanier rivver kumma ihra haemet macha uf die inseln wo der Columbus entdeckt hat. Die Spanier wora unruhig und hen immer ihra auga uf g'hat fer en besser land.

In 1513 is der Balboa augland am Isthmus fon Panama. Dort hat er sei schiff uf der buckel g'nomma und hat es ivver land gedraga, nivver an der Pacific See. In seiner fusstappa wird der Panama Canal now gegrauva.

Der alt Ponce De Leon war governier fon Cuba. Er hat en notion gnickt das irgends en quell der ewige yugend is und in 1512 is er ganga die quell sucha. Endlich is er augland in en frem land, und er hat es Florida g'haesa weil alles foll bluma war. An alle revver das er g'sehna hat is er nei ganga schwimma. Er hat sich even in die schleimicha schwamps rum grullt wie en sau in en dreck loch, avver sei yugend is nimmy kumma. Er het sich zum



Der Ponce de Leon Find die Quelle der Ewige Yugend

deifel ferkaufa sella, wie der Dr. Faustus; avver ferleicht war der deifel zu g'scheit.

Anre Spanier das entdeckungen g'macht hen wora die folgende:

In 1517 hat Cordova Yucatan g'funna: in 1519 hat Cortez die Aztec Insching in Mexico g'mord und g'raubt; in 1520 is der Allyon g'ledert worra fon der Insching in South Carolina; und im nemliche yohr is der Magellan gans um die welt ganga mit seiner schiff. In 1539 hat der De Soto der Mississippi Revver g'funna. Es wasser in dem revver is gehl, und guckt wie Weiner Maertzen bier. Wie der De Soto des g'sehna hat is er durschtich worra, fer er hat fer en lange zeit ken bier g'hat, und er hat broviert der revver leer saufa. Er hat en markwerdicher suf aw grickt, und hat e' paar yohr travla missa fer es ob laufa. Wie er widder zurich kumma is, hat er der same trick broviert. Wie er der revver halver leer g'suffa g'hat hat is er ferschprunga, und sei nachfolger hen ihm en hund's leicht g'macht.

Ëtliche anre Spanier hen entdekungen g'macht, avver sie sin net werth fer derfon schwetza.

Die Francosa sin grossie fish esser, und der g'schmack fon die fish in New Foundland hat

sie doh rivver gezoga. Anfangs in 1503 sin sie kumma und hen entdeckungen g'macht. In 1506 hat der Denys der St. Lawrence Revver g'funna. Der Cartier, Coligny, Melendez und etliche anre sin aw rivver kumma, avver ihra entdeckungen wora all in Nova Scotia und Canada. Der De Monts und Champlain sin avver runner kumma so weit als Pennsylvania. Die Francosa hen aw, wie die Spanier, leit an die neue bletz glost, und hen es land g'nomma im name dem Francosishen koenig.

England war net weit hinner noch in derer bisniss weil sie immer ahead fon anre sei will. Wie der Heinrich VIII g'haert hat das en neu land g'funna is, hat er der John und Sebastian Cabot rivver g'schickt in 1494 fer ihm en schtick ob hocka.

Nach em Heinrich seim todt is der Edd VI uf der thron. Der Edd hat druvvel genunk derhaem g'hat und hat sich net geboddert wega sacha wofon er so wenig g'wist hat.

Nach em Edd seim todt war die Blutich Mary koenigin. Sie het gern en man g'hat avver ken Englisher hat sie wella, so hat sie der Philip II fon Spain, g'heiert. Der Philip het aw gern en frau g'hat, und ken decentie frau hat ihn

ferlangt, so hat er die Mary g'heiert. Des hat beide die Englishe und Spanishe g'schtopt fon doh rivver kumma weil es, ferleicht, unfrieda in die koeniglich familia macha het kenna. Die Mary hat net lang g'laebt, und in 1558 is die Elizabeth uf der thron ganga.

Die Lisbeth war en alt-zeit schport, und hat ihra schiff leit geh glost, und in 1579 hat sie der Francis Drake um die welt g'schickt. In 1583 hat sie der Humphrey Gilbert rivver g'schickt en colony zu blanza in New Foundland, avver des is net gut aus gedreht.

Now die Lisbeth war en alt maedel, avver doch war sie in lieb g'falla mit zwae kerls und hat net g'wist weller das sie heiera set. So hat sie ihra mind uf g'macht das sie die kerls loss warra muss. Aener, der Walter Raleigh hat sie nach America g'schickt in der hoffnung das die Insching ihn morde; der anner, der Earl fon Leicester, hat sie in die bresent geduh bis die hitz fon ihra lieb ob g'wora is. Wie sie ihn aus die bresent glost hat, hat sie ihn am hed fon der armee geduh so das er g'schossa werdt.

Der Raleigh avver hat gut arwet geduh doh, und hat e' paar colonies geblantz in en land das er Virginia g'haesa hat, nach die yungfrau (Virgin) koenigin. Des war in 1606. Der Raleigh hat

noh en monopoly uf die colonizing bisniss g'rickt und er und zwae shtock companies, die London und die Plymouth Company hen die bisniss recht g'runnt.

Die Holland Deutsche hen aw ihra glick broviert und in 1609 is der Heinrich Hudson der revver nuf ganga das heit noch sei name hat.

Zu England missa mir die ehra gevva fer schier all die colonies blanza aus welchem unser Vereinigten Staaten g'wacksa sin.

Epoche II.—SETTLEMENT

Die Erschte Colonies—Wer Sie G'settled Hat
—Ihra Erfahrungen—Harte und Gutie Zeita
—Virginia.

DIE Englishe wora die erschte das en colony
geblantz hen das g'wocksa is. Der
Raleigh, in 1585, hat en colony uf Roanoke
Island geblantz, avver die leit wora fon der letza
sort, und wora yuscht en yohr doh, noh sin sie
widder haem—was noch levendich wora. In
1587 hat der Raleigh es widder broviert, und hat
widder schlecht glick g'hat.

Wie der Jim I uf der English thron kumma
is nach der Lisbeth ihra todt, hat der Raleigh en
bundle duwock mit nach England und hat der
Jim lerna wella schmoka. Am erschta zuck is
der Jim gronk worra Des hat ihn ferzernt und
er hat der Raleigh in die bresent geduh fer
dreizae yohr ; noh hat er ihn raus glosst fer
e' wennig luft. Avver der Raleigh hat hovva
wella das der Jim widder broviert zu schmoka.



Der Jim I Lernt Schmoka

Der Jim hat es widder broviert und is widder gronk worra. Des hat ihn so ferzernt das er em Raleigh der kup ab g'hockt hat.

Ès erscht colony das ebbes nutz war hat die London Company geblantz an Jamestown, Virginia, unnich der Captain Newton. Ès wora lauter mansleit das doh augland sin; ken weibsleit dabei. Die Company hat ihra mistake g'sehna und des naechst yohr hen sie en schiff-load weibsleit rivver gebrocht und ferkaufte zu der kerls an fon 150 bis 200 pund, die helfte aus g'handelt in duwock. Des hat die colony wacksa g'macht. Avver sie hen hartie zeita g'hat weil sie entweder zu dum oder zu foul wora fer es land zu bowera, und etliche yohra hen sie g'laebt uf was sie schtaela hen kenna fon die Insching.

Des hat die Insching wietich g'macht und sie hen die weisa leit g'mord woever das sie sie g'fanga hen. Aens fon ihra beschtie menner, der Captain John Schmidt, war g'fanga g'west bei die Insching, und der alt Powhatan hat g'sad er mus es hern raus g'schlaga hovva. So hen sie ihm der kup uf en schtae glaegt und en alter Insching war yuscht ready fer schlaga wie die Pocahontas, em Powhatan sei dochter, raus g'schprunga is und hat g'sad: "Duh net,



Der John Schmidt Wird Gekeppt

dawdy ; du waescht das ich schund lang gern en man g'hat het. Lass mich ihn heiera, und er werd bald sei laeva laedich." Der Powhatan hat consent, und der Schmidt und die Pocahontas hen g'heiert. Sie hen etliche yohra tzamma g'laebt uf lieb, wind und hundflaesch. Wie der Schmidt des laedich war hat er en schiff-load bulfer en schtick der revver nuf g'nomma und hat sich uf g'blosa.

Nach dem is alles wohl ganga und neue schtettel sin uf g'wocksa. Avver in 1620 sin die Insching widder ufrierisch worra und die settlers hen ihra hend foll g'hat Insching fehta.

In 1676 hen die leit en glaener greek g'hat. Des war g'nennt "Bacon's Greek." Die ursach das sie g'fohta hen war des : Die commona leit hen nix als cent cigars g'schmoked. Noh hen die hochbehnliche leit en law passa wella das cent cigars sella nimmy g'macht warra.

Die commona leit hen noh contend das die hochbehnliche ihra freiheit weg nemma, und der Nat Bacon hat en company menner grickt und hat die staat Jamestown nunner gebrennt. Der Bacon is glei dernach g'schtorva, und des war es end fom schtreit.

Im nemliche yohr hat en Deutscher en schiff-load naeger nach Virginia gebrocht und hat sie

ferkauft als slaves. Des war der aufang der slavery in der Vereinigten Staaten.

Mit naeger fer ihra arvet duh; hen die leit bald all ihra zeit gevva zu duwock raisa. Wan en man fiel duwock g'hat hat, und der duwock war hoch in preis war er reich, avver wan duwock g'falla is in preis war er arm. Duwock is gepasst es same als gelt, und die breddicher und government officers hen die helft fon ihra luh rous nemma missa in duwock. Es hat g'scheint die leit missa entweder duwock fressa oder ferhungera. Der auskum fon dem war das sie all gelt lehna hen missa, und alle bowerei hat mortgages fon fier bis sex foos dick druf g'hat. About 1730 sin e' paar Deutsche bowera fon Pennsylvania nunner ganga und fon dem land gekauft. Sie hen erscht die mischt govel g'nomma und die mortgages ob gegovelt, und noh hen sie waetza, welschkorn und grumbeera geblantz. Sie hen gutie crops grickt. Die anre bowera hen doh en lesson g'lernt.

Mit all die mortgages uf em land sin doch so kerls wie der Washington, der Jefferson, Pat Henry, und die tzwae Lees druf uf g'wocksa.

Virginia hat die erscht Staat Fersammlung (State Assembly) g'hat das in America g'halta war. In 1619 war die fersammlung zamma g'rufa

in Jamestown. Des hat die leit en chance gevva fer ihra aegne laws macha. Avver sie wora getrei zu dem Englishen kron bis der Freiheits Greek in 1774.

MASSACHUSETTS

Virginia war g'settled by die London Company, avver die Plymouth Company is weiter nord ganga und hat ihra land New England g'haesa. In 1606 hat die Company broviert en colony blanza naechst an der Kennebec Revver, avver die leit sin net doh geblivva, und in 1620 is die Company gebust.

Now is en neue company g'macht worra, mit name "Council fer New England." An die zeit drivver in England war en gross schtreit im Staat kirch, und die Chrishta wo ab g'falle sin fon die kirch, sin wiescht beleidicht worra fon die guta Chrishta das fescht g'holta hen zu die Staat kirch. Der abfall hen sich Puritans g'haesa. Sie sin aerscht noch Holland ganga, avver die leit hen nix als kaes g'fressa, und des hen die Puritans net fressa kenna; so hen sie ihra mind uf g'macht sie gehna noch America wo sie essa kenna was sie griega kenna und Gott diena wie sie wella. Sie sin zurick nach England und hen en schiff g'nomma und sin an Plymouth auglandt in 1620.

Ob sie auglandt sin hen sie ihra government officers elect, und der John Carver war Governier. Die Puritans hen grad freind g'macht mit die Insching und fer etliche yohra war ken druvell. Plymouth is langsam g'wocksa.

In 1628 hat die Council aus ferkauft zu die Massachusetts Bay Company, und die Company hat en lot leit rivver g'schickt in 1629, und die hen g'settled an Salem. Der naechst schiff-load hat g'settled an Charleston.

In 1630 hat der koenig fon England der Charter fon die company g'nomma und hat der John Winthrop rivver g'schickt als governier. Der Winthrop hat 1500 leit mit gebrocht, und die hen g'settled an Boston, Dorchester, Cambridge, Lynn, und Roxbury.

Fom aerschta schtaert hen die leit en Legislature g'hat fer ihra laws macha. Die Legislature war elect by die leit, avver yuscht kircha glieder hen vota kenna ; so wer ken "pull" in der kirch g'hat hat, hat aw ken political "pull" g'hat. In derer hinsicht wora die porra die graeschta politicians.

Der Roger Williams war en porra und hat net in alles agreed in politics mit die anre porra, und er hat die wahrheit e' wenig zu plain gebreddicht, so hen die anre breddicher agreed

das er en heretic is. In '1635 hen sie der Williams fort g'yogt. Er is noh naus in den wald sich en haemet zu sucha.

In 1636 is die Anne Hutchinson grosmeilich worra. Weibslait sin natierlich e' wennig grosmeilich. In derer zeit hen die weibslait net schwetza darfa except die mansleit hen es erlaubt ; und wann aenie zu schtarrick



En Cure fer Grosmeiliche Weibslait

g'schwetzt hat, hen sie sie in der buck g'schpannt und an en schtross-eck g'schtellt wo die glaena buva ivver sie schpotta maega. Now die Anne hat contend das en weibsmensch en recht hat ihra erfahrung zu ferzehla in der baedschtund so wohl als en manskerl. Die menner hen sie net convinca kenna das sie letz

is, so hen sie die Anne und dreisich fon ihra nachfolger fort g'yagt. Die weibsleit sin noh naus in die wilderniss zum Roger Williams.

Die Puritans sin doh rivver kumma fer freiheit Gott zu diena nach ihra aega gewissa. Avver wann in ihra schtett kumma sin das en differenta weg g'hat hen Gott zu diena, hen sie schnell ferlassa missa oder sie wacra g'hunga worra. In 1656 hen die Puritans en law gepassed das die Quakers missa all aus die colony ziega. E' paar Quakers sin schtoverich worra und fier dafon sin g'hunga worra, und die anre sin schnell aus gezoga.

In 1675 hen die weisa settlers en gross schtreit g'hat mit die Insching. Die ursach warum sie g'fochta hen war des: Der Koenig Philip, koenig fon der Insching, het gern greek mit die settlers g'hat, und en ehrlicher Insching hat ihn ferrotha zu die weisa leit. Der Insching is g'mord worra fon seiner leit fer des zu saga. Die weisa leit hen in ihra turn drei Insching g'mord. Now war em Philip sei blut uf; er hat die schmokpeif fergrauva und hat sei grubhock und bogafint ready g'macht. Er hat noh die buva zamma g'rufa fer es g'schpass zu sehna. Es war g'schpass uf die zwae seita. Der greek hat about en yohr g'last. Der Philip is



Die Quakers wara Convert zu Puritans

g'schossa worra, und die weisa leit hen en million daller g'schpend ob der greek ferbei war. Sex hunnert weisa hen ihra laeva ferlohra dadurch.

Es haupt g'schicht in die colony war es hexerei. Der Cotton Mather war en hochschtehender porra g'west. Er hat geclaimed das er aw en hexa dockter is.

E' tag hat en glae maedel en roth-und-weiser pole sehna schtech an en eck. Sie hat g'maent es is en tzooker stang, und hat aug'fanga fressa. Wie sie schier drunna am schtumpa war hat sie die fits grickt. Der alt Bahwoll hat grad g'sad sie is ferhext, und es hat ihn net long g'nomma fer die hex zu finna. Die hex of course, is g'hunga worra. Nach sellem sin fiel hexa g'hunga worra bis schier ken weibsleit meh in Salem wora. Noh hat der governier es g'schtopt. Der Bahwoll war en ehrlicher man, und es war net sei schuld das er selvert net ferhext war.

Fon die zeit weg sin die leit in dem colony gut aw kumma und die colony is gross g'wacksa bis der Freiheits Greek; doch in der ursach fon dem greek hen sie fiel leida missa.

RHODE ISLAND

Wie die Anne Hutchinson und die anre weibsleit gebanished wora fon Massachusetts hen sie der Roger Williams augedroffa der zufor gebanished war. Sie sin mitnonner getraveled durch die wilderniss bis sie der Schloporich Hundsfus, en alter Insching, augedroffa hen. Er hat die weibsleit gedowert und hat ihnen en island gevva fer ihra haemet druf macha. Die Deitsche wora derfor dort g'west avver die Insching hen sie net bleiva g'last. Sie hen es Rhode Island g'haesa. Die weibsleit hen noh en government ufg'setzt wo alle frei wora Gott zu diena wie sie hen wella. Wann der Williams net derbei waer g'west hetta sie en staat macha kenna wie die Amazons in Greece in alte zeite. Sie hen ihra erscht land ufg'nomma in 1636 und hen es Providence g'haesa.

Der Williams hat des petticoat government net lang schtanda kenna, und in 1638 hat er en company leit, das in Massachusetts fort g'yagt war um der religion, eiglada by ihm ihra haemet macha. Die hen g'settlet an Portsmouth. In 1639 hen sie en neu schtettle gebauet und hen es Newport g'haesa. Fiel Quakers sin aw kumma und hen doh land uf g'nomma.



Die Rhode Island Staat Fersammlung

Wie so fiel leit uf der island kumma sin hat der Williams g'farricht es kennt unner geh und er kennt sie recht ferliera, so in 1643 is er nach England ganga en charter zu griega fer es zu schteipera, oder wann es unner geht das er es widder claima kann wann es ruf kummt. Er hat en charter grickt, und wie er zurick kumma is hen die leit en Staat Fersamlung elect ihra laws zu macha.

Des war immer en blatz fer frieda. Yeders hat sei aegnie bisniss g'mind und so hen sie schtreit ferhietet. Sie hen ihra zeit gevva zu schula schtaerta, und in 1764 war Brown University gegrindet. Sie hen aw en zeitung gedruckt in 1732, an Newport.

CONNECTICUT

Die leit in Massachusetts das bona fressa laedich wora sin in 1635 ausgezoga en neue haemet zu sucha. Sie sin fer zwae wocha getravelt durch die wilderness bis sie an der Connecticut Revver kumma sin. Sie hen net dorrich der revver bauda kenna so hen sie g'schtopt und die staat Windsor gebauet. Des war die erscht colony in Connecticut.

Die Deutsche wora aw doh g'west eb die Englishe. In 1533 hen die Deutsche en fort am

revver gebauet and wie die Ænglishe kumma sin hen die Deutsche sie net ferbei lassa wella. Die Englishe hen e' wenig English und Latinsh g'flucht und hen die Deutsche ferschrocka so das sie sie ferbei glast hen.

In 1536 is der Ehrw. Tom Hooker kumma mit en lot leit und hen an Hartford und Wethersfield g'settled.

Die Englishe leit wora net gans ehrlich. Sie hen des land fon die Insching g'schtola. Des hat schtreit gevva, und in 1637 is der Captain John Mason und en company menner die Insching nach und hat sie g'schossa und ihra wigwams ferbrennt. Des hat die Pequot Insching fer immer g'settled.

In 1638 war en neue colony geblantz an New Haven. Die war abhengish fon die Connecticut colony avver in 1665 hat der koenig sie fereinigt, und hat ihnen en charter gevva. Unnich dem charter hen die leit ihra governier und fersammlung elect.

Wie der Jim II koenig is worra hat er der Andros rivver g'schickt der charter zu nemma. Wie der Andros es nemma hat wella hat der captain Wadsworth es g'schtola und in en alter baum ferschteckelt, so das wann sie ihra freiheit ferliera das doch die fegel und hausa frei sie kenna unnich dem charter.



Der Charter werd Safe G'macht

Der Jim war net lang uf en Englishe thron, und wie er runner is fer der William druf lassa hat der Andros Connecticut schnell ferlassa missa. Der Koenig Bill hat der alt charter widder in force geduh und die leit widder frei g'macht.

Die leit in Connecticut, wie die in Rhode Island, wora fiel gevva zu lerning, und hen fiel schula g'hat. In 1701 is Yale University gegrindet wora.

NEW HAMPSHIRE

Grad west fon Massachusetts leid en schtick land das schae is aw zu sehna. Es hat schoene, hoche berga und braede revver das durch des land fliesa. Avver auser die schoenheit war es nix wert weil nix als schtae druf g'wacksa is. Im yohr 1622 hat der koenig fon England des land zum Ferdinand Gorges und John Mason gevva, und es naechst yohr hen sie settlements g'macht an Portsmouth und Dover.

In 1629 hen der Gorges und Mason g'fochta ivver wer die schtae laesa set. Sie hen nix blanza kenna. Der Gorges hat g'maent es waer em Mason sie pflicht die schtae laesa, avver der Mason war en second-hand politician in England g'west und net g'used zu so arvet, so hat er



Der Gorges und Mason Dissolva Partnership

grad nunner g'sad er duht es net. Dan hat der Gorges g'sad er mag es land selvert bowera, und hat en frischer duwock g'nomma, der hut uf und is fort.

Der Mason hat es land New Hampshire g'haesa und hat es government g'runnt. Wann er so hart uf is worra das er es net runna hat kenna, hat er es ivver gedreht zu Massachusetts, und widder zurick g'nomma wann er gelt grickt hat.

Endlich in 1680 hat der koenig ihnen en governier g'schickt avver die leit hen die Staat fersammlung elect.

Die leit hen ihra laeva g'macht mit welshkorn und grumbeera tzwischen die schtae blanza. Es hat immer zwae menner g'nomma; aener fer die arvet duh und der anner fer die Insching watcha. So tzwischen es land bowera und Insching fechta hen sie en laeva ferdient.

NEW YORK

Die forgangenen colonies wora all g'settled by Englishe leit. Die Holland Deutsche hen broviert ei zu mixa mit die Englishe in New England avver sie hen ennoner net ferschteh kenna so hen die Englishe die Deutsche fort gedrivva. Die Deutsche hen doch en gut land grickt und hen in New York g'settled.

In 1609 is der Heindrich Hudson aug'land uf Manhattan Island (now New York), und hat es New Netherlands g'haesa. Die Deutsche hen noh aug'fanga handla mit die Insching. In 1621 hat die West India Company en patent grickt uf es land, und in 1623 hen sie leit rivver gebrocht und hen uf Manhattan Island g'settled. Sie hen es island gekauft fon die Insching for \$25, die helft aus g'handelt in whiskey. Sie hen es noh New Amsterdam g'haesa.

Doh hen die Deutsche g'laebt und g'schmoked und beer gedrunka, mit nix wichticher sie zu bloga den das wer es naechst uf setza soll. Avver der tag is kumma wo sie druvvel genuuk grickt hen. Wie der Koenig Charles II fon England ivver die map geguckt hat, hat er g'sehna das es en gut land is und das schtocks in Wall Schtrose bald nuf gehn. So hat er aus g'macht das es land is sei bei recht fon—well, weil er es gern g'hat het. Er hat en schiff und soldata rivver g'schickt es land zu nemma. Wie sie kumma sin, sin die Deutsche so ferschrocka das sie die staat zu die Englishe gevva hen ohne g'fochta.

Der koenig hat die staat now zum Duke fon York gevva. Er hat es g'used fer en private picnic grund. Fom Duke hat es der name York

grickt. In 1673 hen die Deutsche es widder fon die Englishe g'nomma, die Englishe yuscht zu weisa das sie noch levendich sin, und es naechst yohr hen sie es widder nivver zu die Englishe g'hand. In 1683 hat der Duke en neuer governier rivver g'schickt und hat die leit erlaubt en State Fersamlung zu electa.

E' paar yohr dernach is der Duke koenig fon England worra mit name Jim II. Er hat now en g'schwolla kup grickt, wie fiel anre duhn wann sie en raise in ihra luh griega. Er hat die Staat Fersamlung uf gebrocha und sei New York zeitung ob g'schtopt ohne sei subscription betzahla.

Em Jim sei zeit uf em thron war kurtz, und in 1689 is der Koenig Bill nuf ganga der sitz warm zu halta. Now hen die burger en chance g'hat sich frei zu macha. Der Leisler hat sei alt bulferbix gricht und is em governier nach. Der governier hat sich ferschteckelt in en brewery, und der Leisler hat en neu government uf g'setzt.

Now is der Leisler hochbehnich worra weil er governier war und hat fiel feind dadurch g'macht. In 1691 hat der Koenig Bill der Colonel Sloughter rivver g'schickt governier zu sei. Der Leisler hat g'wist wann er en gut ding



Der Hudson Kauft Manhattan

hat, und hat die office net uf gevva wella. Der Sloughter hat der Leisler noh arrest, und e' ovet das er g'suffa war hat er die babeera g'signed fer em Leisler sei todt.

Der Leisler war en schmaerter man und hat weit in die zukunft sehna kenna, und hat geduh yuscht wie office leit heit duhn.

Fon dera zeit an war New York loyal zu dem Englishen thron bis der Freiheits Greek.

Die haupt g'schicht das g'happened is in derer zeit war in 1769, wie der alt Rip Van Winkle eigschlofa is fon der faulheit, und is net wacker worra bis election tag tzwanzig yohr dernach.

PENNSYLVANIA

E' tag is der English koenig und en kerl mit name Penn ganga gamla uf en geils race. Der Penn hat uf der schwartz gaul g'wet, und hat g'wonna. Now der koenig war hart uf und hat net bezahla kenna. Der alt Penn is g'schtorva avver in seim willa hat er die schuld zu seim buh, der Bill Penn, fermacht. Der Bill war net langsam und is ganga es zu collecta. Der koenig hat decide das weil er ken gelt hat und hat so fiel land drivver in America, gebt er em Penn en schticklie land so das er zufrieda is.

In 1681 is der Bill Penn rivver kumma und hat sei land ufg'nomma. Der Bill war en Quaker und die Quakers wora immer fer frieda halta. Sie wora gutie leit, oh so gute—zu gute zu laeva, so sin sie glei ausg'schtorva so das heit yuscht noch e' paar Quakers in die staat sin. Der Bill war zu ehrlich fer sei land fon die Insching zu schtaela, so hat er es widder fon ihnen gekauft. Wie er es gekauft hat, hat er en foss XXX quality Jersey applejack grickt und die Insching all eiglauda fer kumma und helfa es drinka und en treaty macha. Sie sin kumma und hen en herrliche zeit g'hat. Die Insching hen der applejack gedrunka weil der Bill die peif g'schmoked hat, und bis ovet hen sie der Bill haem fora missa, avver es land war sei. Er hat es "Em Penn sei bush" g'haesa, oder, in English, Pennsylvania.

Now wie die babiera all g'fixt wora, war er ready ahead geh mit der business.

In 1682 hat er en staat gebauet und hat es Philadelphia g'haesa. Der name maent "Briederliche Lieb," er hat es so g'nennt weil yeder bruder sich selvert so lieb g'hat hat das er ken zeit g'hat hat die anre brieder zu lieva. Des geht die Philadelphia leit heit noch nach.



Der Bill Penn Macht en Treaty

Fiel anre staet sin glei gebauet worra, und fiel leit sin kumma ihra haemet doh macha. Es is so en schoene Staat das der Lord Baltimore en schtick dafon schtaela hat wella. Avver der Penn hat net sound g'schlofa und hat ihn g'fanga und in 1766 hat er der Mason und Dixon grickt fer en line schpanna tschwischa sei land und em Lord Baltimore seins.


In derer Staat wora drei sorta leit: die Englishe, Deutsche und Scotch-Irishe. Sie sin gute aw kumma, und wora frei Gott zu diena wie sie hen wella, oder gar net waun sie so g'fielt hen.

Freiheit war es haupt ding in derer Staat, und alle sacha im goverment war ferdaelt. Die Englishe hen all die gute offices g'hat; die Scotch-Irish wora all policemenner, und die Deutsche hen vota kenna avver hen ken office haeva kenna. Die leit hen ihra Staat Fersammlung elect und ihra laws g'macht.

Pennsylvania is g'nennt die Schloss stein Staat weil sie in die mit fon die erschta dreizae Staet is.

NEW JERSEY

Wie der Duke fon York expect hat das er bald koenig werd is er sehr freigevvich worra. Er hat en schtick schwam land g'hat das er net g'wist hat was mit zu duh, so hat er es zum



Die Aershta Bowera in New Jersey

Lord Berkeley und George Carteret gevva. Sie hen es New Jersey g'haesa.

Der Berkeley und Carteret wora zwae loafers im Englishe Court, und der Duke hat g'sehna das er sie lose warra mus, und er hat des es bescht duh kenna eb er koenig war. So hat er ihnen yeders en schaufel, recha und mischt govvel gekauft und sie rivver g'schickt es land zu bowera.

In 1665 hen sie en schtettle gebauet an Elizabeth. Die leit hen in frieda g'laebt—wann die moskeeters South ganga sin fer der winter zu schpenda.

In 1674 is der Lord Berkeley meed worra bowera, und hat sei land zum Bill Penn ferkauft. Er is noh widder nach England ganga und hat e' paar moskeeters mit g'nomma wo er sie getrained hat zu usa anstat boat aesel uf em canal.

In 1682 hat der Carteret aus ferkauft zum Penn, und is aw haem nach England. Der Carteret hat en ordlich grosse naas g'hat und die war en guter mark fer die moskeeters; an alle schtich is sie graesser worra, und endlich hat er haem missa.

DELAWARE

“ Zu dem der da hat soll gegeben werden. ”
Now wie der Penn New Jersey gekauft hat, hat

es g'scheint das wann er bald die gans welt aegna wet, und so hat der Duke fon York ihm die Staat Delaware noch gevva wann er ferschprecht aus politics in England zu bleiva. Der Duke war froh es lose zu warra weil es foll Schwedes war. Der Penn hat es g'nomma ohne dank g'sad, und hat en general land agency g'schtaert.

Der Penn hat beida New Jersey und Delaware en Legislature gevva, und die leit wora frei zu electa wer sie hen wella.

So unnich em Penn sei government sin die leit gute aw kumma bis der Freiheits Greek.

MARYLAND

Die Puritans und Quakers wora net die aensige das gepersecute wora in England. Wie die Protestants es power grickt hen, hen sie die Catholishe so hart g'halta wie die Catholishe sie g'halta hen wie sie in power wora. So in 1632 hat der Koenig Charles I em Lord Baltimore en Staat doh in America gevva fer sei arme Catholishe freind. Der Lord Baltimore hat des land Henrietta Marialand g'haesa, nach die Fraulein Charles I. Avver der name war so gross das der Baltimore es net all in sei sock duh hat kenna, und en schtick dafon is ferlora ganga. Was g'lasst war fom name hat der Baltimore revised, und hat es land Maryland g'haesa.



Die Catholische Landa in Maryland

Der koenig hat ihnen en charter gevva, und unnich dem charter wora die leit frei zu duh wie sie hen wella ohne tax betzahlt. Sei hen ihra aega Staat Fersamlung und policemenner elect.

In 1633 hat der Leonard Calvert em Noah sei Ark und sei taub g'fanga. Es naechst yohr hat er die taub zum Ark g'schpannt und is rivver kumma und g'settled an St. Mary's. Dort hen die Insching sie g'lernt bauera. Es erscht yohr hen sie dreizae kolva welschkorn g'raised.

Now wie der Clayborne fon Virginia g'sehna hat das die Marylander sich so gute enjoya hat er g'maent er set es land hovva. Etliche mohl is er nuf nach Maryland der Lord Baltimore zu leddera, und fer tzaea yohr hat er em Lord Baltimore alle dann und wann in's g'sicht g'schlaga.

Es government hat freiheit erlaubt fer beida Protestanishe und Catholishe, avver die Protestanishe political bosses hen die votes fon die Assembly menner gekauft und die Catholishe naus geduh. Darum is en schtreit ausgebrocha tzschwischen die Catholishe und Protestantishe in 1655, und widder in 1689.

Now, fer des ding zu settla, hat der Koenig Bill ihra charter g'nomma und Maryland en royal province g'macht; avver in 1716 hat er

der charter widder zurick gevva und es alt government war widder in force bis tzwanzig minuta nach der drei, morgets, July 4, 1776.

NORTH UND SOUTH CAROLINA

Die erscht law das gepasst is worra in die colonies war was sie "religious tolerance" g'haesa hen. Ich haes es "religious intolerance." In Virginia, wer net Episcopal war hat extra tax betzahla missa, und so sin dausende unzufriedena leit fon Virginia weiter south ganga und land uf g'nomma ohne en government uf setza.

Ihra anarchy hat net lang g'last, fer in 1663 hat der Koenig Charles II des land zum Lord Clarendon gevva. Der Clarendon hat des land Carolina g'nennt nach em koenig sei Latinishe name.

Now hat der Clarendon leit gebrocht fer des land zu settla. Sie wora all fon der nobility class und hen net schaffa kenna. Sie hen drei colonies geblantz—Albemarle, Clarendon und Cartaret colony.

Der Lord Clarendon hat now en hoch gelehrter man grickt fer en plan fon government zu macha. Er hat des plan der "Grand Model" g'haesa und es war so grand und gute das in e' paar yohr sin die leit es laedig worra und hen en

neu government g'macht. Sie hen ihra officers selvert elect und alles is gute ganga.

In 1711, und widder in 1715, hen die leit schtreit grickt mit die Insching. Die Englishe hen die Insching nach g'macht in faulheit und im fisha. E' tag hat en Englisher der Insching fertzaelt fon die grosse fish das er g'fanga hat, und wie en alter Insching g'sad hat das er net g'wisst hat das es so grosse fish gebt, is der Englisher baes worra, und doh hat die schtreit aug'fanga.

Und so, tzschwischa tax betzahla und Insching fechta hen die leit die zeit ferdrivva, bis in 1729 wora die proprietors froh em koenig en "deed of assignment" gevva uf ihra land. Der koenig hat es land ferdaelt in tzwae staet, und hat sie North Carolina und South Carolina g'haesa. Yeder Staat hat en Assembly g'hat, und die leit hen aug'fanga rice raisa so das die Chinese ebbes zu fressa hen wann sie rivver kumma.

GEORGIA

Es yohr 1732 hat gezaelt fer fiel in Americanish historie. In dem yohr war der George Washington gebora. Des war gute fer die Americaner. Im sama yohn hat der koenig fon England em Jim Oglethorpe en gross schtick land in America

gevva, welch er Georgie, oder Georgia, g'haesa hat, nach em Koenig George II.

Des war gute fer die Englishe. In derer zeit in England wann yeman schulda g'hat war er in die bresent geduh bis er der "letzter heller" bezahlt hat. Now is der Oglethorpe rum ganga und hat die leit grickt das ihra schulda fer yohra net bezahlt hen, und hat sie doh rivver gebracht und yeders en bauerei gevva.

Des is der correct solution zu der tramp question heit, avver es is net in practice. Wann unser government der tramps yeders en million daller und en bauerei gevva daet, waera es sehr wenig tramps im land.

In 1733 hat der Oglethorpe und sei leit en settlement g'macht an Savannah. Sie hen tzwae porra, der John und der Charles Wesley, mit rivver gebracht, und die hen die Methodist kirch g'schtaert. So g'schwind das die Insching aus g'funna hen das der Oglethorpe en wig waert und sie hen ihn net scalpa kenna, hen sie en treaty g'macht mit ihm.

Doch wann die Insching freindlich wora, hat er druvvel grickt mit sei nachbera in Florida. In 1740 is der Oglethorpe ganga Florida fon die Spanishe nemma, avver er war net siegreich und is widder haem. Tzwae yohr darnoch sin die



Der Oglethorpe Grickt die Haar G'schnidda

Spanishe nuf kumma Georgia zu nemma, avver der Oglethorpe hat sie ferschrocka und sie sin widder haem ohne siegen.

In 1743 hen die leit in Georgia en frei government uf g'setzt. Des war die erscht Prohibition Staat. Es government hat ken drom in der Staat erlaubt. Des hat fiel leit unzufrieda g'macht und sie sin nuf nach South Carolina wo sie ihra "moonshine" saufa hen kenna ohne stoerung.

In 1752 is Georgia en royal province g'macht worra und so is es geblivva bis der Freiheits Greek.

Epoche III.—FRANCOSISH GREEK

Die Francosa und Englishe Fechta fer des
Land—Der George Washington Beweist Sich
en Guter Soldat—England G'winnt Alles.

DIE forgangenen colonies wora all English,
avver die Englishe wora net die aensige
leit doh. Die Francosa hen colonies g'hat an
die Great Lakes und am Ohio und Mississippi
Revver bis nunner an New Orleans.

KOENIG WILLIAM'S GREEK

Die Englishe hen des land geclaimed und des
hat greek gevva. In 1689 is greek ausgebrocha
mit England und Frankreich und, of course, die
Englishe und Francosa in America hen mit
macha missa. Des war Koenig William's Greek,
und hat g'last bis 1697, wie sie en treaty g'macht
hen. In dem greek war nix g'wonna. Sie hen
g'fochta yuscht fer es fun dafon.

KOENIGIN ANNE'S GREEK

In 1702 war Koenigin Anne's Greek. Die Francosa hen g'selna das sie die Englishe net hocka kenna, so hen sie die Spanishe und Insching gricht fer ihnen zu helfa. Der greek hat g'last bis 1713, wie sie en treaty g'macht hen, bei welchem Frankreich Nova Scotia zu England gevva hat.

KOENIG GEORGE'S GREEK

In 1774 war widder en wunnerbar greek. Des war Koenig George's Greek. Die Francosa hen g'wist das die Englishe schtark sin, so hen sie grosse bereitung g'macht die Englishe zu hocka. Die Englishe hen drei dausend man g'hat und sin nuf nach Louisburg die Francosa zu meeta uf ihra aega grund. Wie sie nuf kumma sin hen die Francosa uf gevva ohne unnaetig blut fergiesa. Des hat der greek g'settled, und in 1748 hen sie en treaty g'macht bei welchem es agreed war das alles sei soll wie es war for em greek.


FRANCOSISH UND INSCHING GREEK

In sellra taga war freiheit wolfe und hat net lang glast. In 1754 is greek widder ausgebrocha mit die Englishe uf e' side und die Francosa und

Insching uf die anner. Der Greek hat g'haesa der Francosish und Insching Greek, und war der graescht greek das in America g'fochta war dis hieher.

Now war der George Washington alt genunk fer vota, und es Government fon Virginia hat ihn naus g'schickt die Francosa zu hoch. Er is ganga, und an Great Meadows hat er sie augedruffa und hat sie g'leddert. Now hat er dort en fort gebauet, Fort Necessity. Die Francosa sin widder zurick kumma, und uf der fiert July hen sie der Washington g'leddert. Der Washington is noh haem ganga, avver er hat noch blut in der auga g'hat.

Es naechst yohr hat England grosse bereitung g'macht fer fechta und der General Braddock war am hed fon der soldata. Unser George war widder derbei. Er hat em Braddock g'sad wie mir die Insching fechta mus, avver der Braddock hat yuscht g'sad, "Was waes so en rutznaeslie wie du?" und hat em Washington sei rath net g'nomma. Sei hen die Insching und Francosa augedruffa naechst an fort Du Quesne, und sin g'leddert worra. Die soldata sin alle wege naus g'schprunga, avver der General Braddock is retreat in gute order tschwische



Der Braddock Retreat in Gute Order

fier soldata, gedraga uf en board. Des war em Braddock sei letschter retreat.

Am Mississippi Revver nach hen sei g'focht bis nunner an New Orleans, und wann die Englishe ken bulfer meh g'hat hen, hen sie die Francosa g'fanga und in der revver g'schmissa die allegators zu fiedera.

Sie hen aw g'fochta drovva in New York, New England und in Canada. Die Francosa hen dann und wann en schtich g'nomma, avver die Englishe hen zu fiel trump in der hand g'hat fer die Francosa. Now war schier alles in Englishe hend except e' wennig in Canada. Alles was ivverich war fom Francosish armee hat der Montcalm nuf zu Quebec g'nomma. Doh hat der English General Wolfe der recht bower schpiela missa oder er hat es ferlohra. Beida der Wolfe und der Montcalm sin g'schossa worra.

Der letscht schtich is g'nomma worra bei die Englishe, und es game war ferbei. Die Englishe hen g'wonna, und in 1763 hen sie en treaty g'macht das ihnen schier gans America gevva hat.

Die Americaner hen fiel leida missa dorrich dem greek; es land war mit blut g'wessert und is sehr fruchtbar worra, und es hat sie net lang g'nomma fer widder aw geh wie g'waenlich mit ihra bisniss.

Epoche IV.—DER FREIHEITS GREEK

Die Ursache warum das Sie G'fochta hen—Der
Freiheits Erklärung—Uf dem Schlachtfeld—
Der Auskum fom Greek.

URSACHE DER GREEK

ENGLAND hat frieh g'sehna das wann sie
auhaeva zu America kann der koenig e'
wennig gelt aus die colonies macha wann er hart
uf is. Es war fashion bei die koenige immer hart
uf zu sei, und so hen die Americaner immer
extra tax betzahla miassa.

Das English Parliament hat laws g'macht das
die Americaner g'maent hen wora net recht,
deweil sie ken representative in Parliament g'hat
hen.

Die Navigation Laws hen g'sad das alles was
in America g'macht werd mus in England
ferkauft warra, und nivver g'schickt in Englishe
schiff. Die rates wora hoch, und ferleicht hetta

anre schiff es g'nomma an cut rates, avver es hat g'schipt sei missa uf Englishe schiff. Des war genunk die Americaner zu ferzerna.

Nach dem Navigation Act is die Stamp Act gepassed warra bei Parliament. Des war en law das ken bisniss babiera g'macht sei sella ohne en tzwae-cent stamp druf boba. Es paste uf die stamps war groatsich und hat en schlechter taste g'hat, so hen die colonists der koenig g'frogt fer die stamps selvert schlecka. Er hat refused, und so hen die colonists refused die stamps zu usa. Des hat der koenig ferzernt.

Fer aeva warra mit die colonists hat der koenig en tax uf tae geduh und hat etliche schiff-load tae rivver g'schickt. Now hen die leit tae drinka ob g'schwora. An Charleston hen sie der tae in der keller geduh und ferderva g'lasst; an Philadelphia und New York hen sie es zurick nach England g'schickt; und an Boston hen sie es g'nomma und en "pink tea" party g'macht fer die mermaids unnich em see.

Now hat der koenig en armee rivver g'schrickt fer die Americaner zu compella tae drinka und en tax fon en cent der schlook betzahla. Die colonists wora compelled die English soldata zu fiedera und erhalta, und sache bei laega fer en armee fon ihra aega raisa und erhalta. Des hat



En Boston "Pink Tea"

zu fiel gekoscht, so hen sie decide es is woelfler die British soldata zu schiesa. Sie hen es broviert e' tag an Boston. Fiel Britische sin g'schossa wara, und die wo levendich dafon kumma sin, sin g'schwind in die staat g'schprunga fer noch en deller foll bona eb sie schterva.

Des hat die Americaner wietich g'macht, und ivver em gonsa land hen die stump speakers speeches g'macht gegen es British government. Drunner in Virginia hat der Pat Henry in en speech g'sad: "Der greek is doh; mir missa fehta. Now geb mir freiheit oder geb mir der todt." Das Gott uf der side der colonists war kann mir sehna in dem, das em Pat sie Wunsch erfüllt is worra. Er hat der tag der freiheit g'sehna, avver is glei dernach g'schtorva.

DER GREEK UND DER AUSKUM

Deweil die forgangenen sache ferrichtet sin worra hat die erscht Continental Congress sich fersamelt an Philadelphia, September 5, 1774. Der Washington hat soldata g'sucht und en armee uf g'macht, weil der Pat Henry rumganga is und hat die leit g'sad, "Ich sag eich widder, mir missa fehta."

In 1775 hat es fehta ernstlich aug'fanga. An Lexington hen die British soldata e' paar

Americaner mit flinte augedruffa, und sie hen g'maent sie kenna die Americaner ferschrecka wann sie base gucka und g'reischa, "Gehet haem, dir rebels;" avver die Americaner hen sie geantwort mit e' paar schuss bulfer und schrote. Nach dem hen sie g'fochta an Concord, Ticonderoga und Crown Point.

Now hat der General Gage (British) soldata nivver g'schickt fer Bunker Hill nemma. Dort wora tzawe hivvel g'schtonna das geguckt hen wie tzwilling und der British officer hat der unnerschied net g'wist, so hat er Breed's Hill g'nomma; und uf dem hivvel war der battle fon Bunker Hill g'fochta. Bunker Hill war naeva draw g'schtonna, hat der fecht g'sehna und is ob kumma mit die ehra, weil Breed's Hill alles leida hat missa. Des is yuscht wie es heit geht: Die officers das elect warra greiga der luh und die ehra fon der office, weil ihra deputies all die arvet duhn.

Now sin die Americaner alle wege bei kumma und hen die armee gejoined. Der Is Putnam hat sei oxa im feld schteh g'losst und is fort mit die soldata. E' mohl wie die Britische ihm noch wora is er ivver maechtiche felsa am berg nunner g'ritta und hat widder die oxa oyva draw schteh

g'lost. Wie er nunner is, hat er sich im saddle rum gedreht, hat sei dauma an die naas, und die finger g'schiddelt an die Britische.

De Americaner hen g'fochta yuscht fer ihra recht, avver in 1776 hen sie en notion grickt sie daeta yuscht so gute fechta fer freiheit weil sie anyhow fechta missa. Wie Congress sich fer-



sammelt
hat, hat
der Dick
Lee en
resolu-
tion in-

troduced das die colonies frei sin. Der 'Tom Jefferson hat sei typewriter maedel aus em bed g'yagt an mitter nacht und hat aug'fanga der Freiheits Erklärung dictata. Und uf der fiert July hat Congress es gepasst. Der alt bellman der die gluck tziega hat sella, wie er des g'haert hat, hat er so orrig g'lacht das es

gebei g'schiddelt hat und die gluck hat g'schлага ohne am schtrick gezoga. Des war aw es erscht yohr das die younga Americaner die finger ferbrent hen mit shooting crackers.

In dem yohr hat der Washington sei weg dorrich New York und New Jersey g'fochta.

An 'Trenton wora e' paar dausend Hessa das gedingt wora bei England fer helfa fechta. Der Washington hat sie fanga wella, so hat er g'wart bis der revver gans ivver g'frora war, noh is er nivver. Der Hopkins sagt er und sei armee sin nivver uf skates; der Bill Nye und anre saga sie sin nivver in boats; ich sag eich die woret: ich waes net wie sie ganga sin, avver sie hen anyhow die Hesse g'fonna und hen sie nach Lebanon und York g'schickt, wo, es wird g'sad, g'schpooka sie noch uf dunkele nachta.

In 1777 sin de Britische zimlich naechst zu Philadelphia kumma wo der capital war, und die congressmenner hen g'schwindt in ihra autos g'schpannt und sin nach Lancaster getzoga. Fon dort sin sie nach York ganga.

Der Lafayette is fon Frankreich rivver kumma fer helfa fechta. Winter is now kumma und der Washington hat uf g'schtellt an Valley Forge wo er und sei soldata g'laebt hen uf nix.

Es naechst yohr hat Congress der Benj Franklin nach Frankreich g'schickt fer en treaty



Der Washington Geht Hessa Fanga

zu ferrichta. Wie der Benj nivver kumma is, hat er sei Sontags glaeder aw, und hat sei schtiffle forna geblacht (fer en guter sodat guckt nie net hinner sich, und shoe black war hoch in preis), und is ganga der koenig sehna. Bis sie e' paar gedrunka hen g'hat, war der treaty g'macht.

Am Battle fon Monmouth hat der General Lee sich schlecht betraga und der Washington, der net liega hat kenna, hat g'flucht das die bloa flomma g'floga sin.

Es South war immer en guter blatz fer fechta, so hen sie es graescht dael fom greek dort nunner g'moved. Im North war es nimmy so lively und der General Benedict Arnold is sei job laedig worra. Er hat arrangements g'macht fer sei armee zu der Britische ferkaufa. Der Major Andre, der die babiera delivera hat wella, is g'fanga worra bei drei Americanishe soldata, und is g'honga worra. Der Arnold is nivver zu die Britische, und nach dem das er sei haemet in England g'macht hat, hat er oft g'wünscht das er aw g'honga waer worra. Die drei menner das der Andre g'fanga hen, hen en guter pension fon Congress g'rickt das betzahlt war in babieriche daller das waert wora sechzich zu aens in silver. Kens fon ihnen is reich g'schtorva,

Endlich hen die Americaner die Britische all in Virginia g'yagt. Sie hen ihra headquarters an Yorktown g'macht wo der Washington sie fer drei wocha belagert hat. Die Britische hen nimmy laenger aushaeva kenna, so uf der 19th October hat der Cornwallis der Irish wo sei gaul getend hat, der General O'Hara, nivver zum Washington g'schickt mit seim daega.

Now war der greek bald ferbei und England war ready fer frieda zu macha. Congress in 1782 hat Commissioners appoint fer en treaty zu macha, avver es war net alles g'settled bis es naechst yohr. Uf September 3, 1783, mit en hertz foll traurigkeit und en bauch foll "rot gut" whiskey, hat der English koenig der treaty g'signed das America frei g'macht hat. Bei dem treaty hat England alles was sie in dem land geclamed hat ivvergevva zu die Americaner.

Epoche V—CONSTITUTIONAL GOVERNMENT

Die Presidents Und Was Sie Geduh Hen in
Office—Der Whiskey Greek—Greek Mit Eng-
land—Greek Mit Mexico—Der Civil Greek—
Der Spanish Greek—Bis uf dem Yetzigen Tag.

WIE der Freiheits Greek ferbei war hen die
leit sich nunner g'settled zu bisniss und
zum bescht macha aus was sie im greek g'wonna
hen. So in 1787 hen sie en constitution adopt das
freiheit guaranteed zu alle so lang das sie sich aus
der bresent halta kenna. Unnich dem constitu-
tion hen sie elect als President fon der
Fereinigte Staaten, der dawdy fon unserm land,
der

GEORGE WASHINGTON

Er is inaugurate worra April 30, 1789. Der
Washington war net President fer es gelt das er
aus der office macha hat kenna fer es war sehr
wennig drin, und was drin war, war net fiel
wert.




Sie Settla der Whiskey Schtreit

In seiner zeit hat er druvel g'hat in Pennsylvania. Pennsylvania hat drei sorta leit—Irish, Deutsche und English. Die Irishe hen die Deutsche machawella Irish whiskey zu saufa, und die Deutsche hen refused weil sie immer zufrieda wora mit bock beer. Wie sie aug'fanga hen fehta hat der Washington soldata g'schickt der schtreit zu settla. Die soldata hen es g'settled wie die lawyer en estate settla wann die erber drivver fehta—es gans estate nemmafer en fee. So hen die soldata whiskey und beer g'suffa bis kens meh g'lost war fer drivver fehta. Des hat der schtreit g'settled. Der Washington war President tzwae terms, und hat der dritt term refused so das er e' wenig zeit grickt fer die gewonhchita der grumbeera keffer zu schtudya. So is der

JOHN ADAMS

elect worra und hat die office g'nomma in 1797. Der Adams is fon Massachusetts kumma und hat grad aug'fanga ufrauma. Trade mit die auslaender war net so gute weil die Francosa all die Americanishe schiff g'schtola hen das sie uf em see fanga hen kenna.

Der Adams hat aw en zug uf hand g'hat. Wie hausbutza zeit ferbei war hat er der capital fon Philadelphia nach Washington g'moved. Es war ken grosser zug. Er hat sei Presidential



Der Adams Ziegt nach Washington

cabinet uf en schubkarich g'lade und fort g'fora und Congress is ihm nach g'luffa.

In derer zeit is unser George g'schtorva und es land is so gute g'wessert worra das es naechst yohr wonnerbar fruchtbar war. Wie der John Adams die office uf gevva hat, hat der

THOMAS JEFFERSON

es uf g'nomma und em Adams sei bisniss all ivver geduh weil es ihn net g'suit hat.

Des war en sehr unruhige zeit. Der schtreit tschzwischen England und Frankreich hat America ordlich hart affect, weil die Englishe all die Americanishe schiff und schiffleit g'schtola hen das sie fanga hen kenna. So hat der Jefferson all die schiffleit haem g'rufa und uf "cold storage" geduh ohne pay, bis der druvel ferbei war. America hat dadurch leida missa, und die leit hen net geglich der weg wie der alt Jeff es government g'runnt hat, so nach der naechst election is der Jeff widder an 's bowera, und der

JAMES MADISON

hat der President schtool warm g'halta fer die naechst acht yohr. Der Jim hat bisniss aug'fanga bei em Jeff sei schlectie acts repeala und anre substituta das yuscht so schlecht

wora. Mir wissa all das en substitute nie net so gute is als es genuine, und mer kann denka das des widder druvel g'macht hat.

England hat widder en armee rivver g'schickt America zu leddera. Die Americaner hen Canada nemma wella, und der General Hull is nach Detroit. Avver wie er g'haert hat das die Britische kumma hat er es leinduch aus seim bed g'nomma und zum fenschter naus g'schiddelt. Die Britisihe hen noh Detroit g'nomma, und zeita hen mir nix meh g'haert fom General Hull.

Der General Jackson und der "Tippecanoe" Harrison hen die Insching zurick g'halta fon fechta.

America hat immer an "sanitation" geglaubt, und so das es land net so wiescht befleckt werd mit blut hen sie es menscht uf em wasser g'fochta.

Der Commodore Perry hat e' paar boats druvva uf Lake Erie g'hat. Die Englishe sin ihm nach, und wie sie ihn g'fanga hen, hat er zum Madison getelephoned, "Mir hen der feind auggedruffa, und er is unser."

Drunna in New Orleans hat der General Jackson die alligators g'feedert uf die Britische soldata wo noch doh wora, und der greek war bald ferbei.



Der Jackson Feedert die Alligators

Der Madison hat fiel druvél in seiner zeit g'hat und doch war er immer fraelich. In 1817 is er fom President schtool, hat en geboga schpell uf der sitz g'laegt, und hat der

JAMES MONROE

druf g'lost. Avver der Monroe is net uf gejumped bis sei acht yohr uf wora.


Des war die goldich zeit fer America, und die leit hen g'maent der millennium waer doh. Ivver em ganza land war frieda except wo hie und doh her General Jackson mit die Insching g'fochta hat.

Der Monroe war gute und sound in doctrine, und sei doctrine schteht heit noch so gute als neu. Zu dem kenna etliche aaslaender bezeige.

Die letsche drei Presidents wora fon Virginia, und now sin die leit widder nuf nach Massachusetts und hen der

JOHN QUINCY ADAMS

runner g'holt fer President zu sei. Er war, ferleicht, en fiert cousin zum John Adams, und war en guter man. In seiner zeit in office war bisniss e' wennig dull. Congress hat en appropriation g'mactht fon zwae barl colick, und der President hat sei haus gans ivver g'weiselt. Fon sellra zeit is es "White House" g'nennt.



Es White House Werd Aug'schtricha

Wie er alles gute und schoe uf g'fixed g'hat hat,
is er naus gezoga und der

ANDREW JACKSON

is nei gezoga. Der Andy is ruf kumma fon
Tennessee, mit all sei hausrot uf en bort wagga
glauda, und en groher aesel ei g'schpannt. Wie
sei zug ferbei war hat er die peif aug'schteckt
und sich g'sitzt fer acht yohr, in welcher zeit er
die Insching und tariff questions considered hat.
Wie sei zeit uf war is er naus und hat blatz
g'macht fer der

MARTIN VAN BUREN

Ëm Van Buren sei zeit hat aug'fanga mit em
panic fon '37. Er war in Wall Schtross, New
York, gebora, und, of course, war en guter
financier. Wie der panic ferbei war wora die
leit all so reich mit babierich gelt das sie meh
banks schtaerta hen missa. Nach em Van Buren
hen die leit der

WILLIAM HENRY HARRISON

aus em bush in Ohio g'rufa der schtool zu
nemma, avver er war net g'waent so hoch zu
laeva, und es hat ihn glei todt g'macht. Nach
em Harrison seim todt hat der

JOHN TYLER

der schtool g'nomma, und die bisniss is ahead ganga es same als wann aenig ebber schonscht g'schtorva waer. Die weil das der Tyler president war hat er nix g'hat ihn zu druvela. Yuscht eb er aus office is hat Texas annexed sei wella, avver er hat selle question g'lost fer der

JAMES K. POLK

zu settla. Texas, wie en wilder shtier, is loss gebrocha fon Mexico und der Polk hat es annexed zu unser Staaten. Mexico hat now fehta wella. Der Davy Crockett is nunner ganga und im alta Almo hat er selvert die Erscht Mexican Army Corps g'leddert, ihnen yuscht zu weisa wie zu fehta. Der Crockett is avver g'shossa warra, und der Polk hat g'sehna das der job zu gross is fer e' man, so hat er der Zach Taylor mit en armee nunner g'schickt. Der Taylor hat em General Santa Anna der hilsich beh ob g'schossa, und der greek war ferbei. Now, mit em greek ferbei, hen die leit ebbes duh missa fer en excitement zu macha, so hen sie widder en election g'halta, und hen der

ZACHARY TAYLOR

elect als President. Now is gold g'funna worra in California, und der Taylor hat sich gedummelt



Der Zach Taylor Settelt der Mexican Greek

es ei zu nemma als en Staat eb en onner reich rivver kummt und schtaelt es. In seiner hurry hat er sich ivverhitzt und is g'schtorva. Der

MILLARD FILLMORE

hat now die arwet ufg'nomma wo der Taylor ob g'lost hat, und hat die zeit ferdrivva in compromises uf der "slave trade" macha. Des war en wichtiche question die zeit das der Fillmore die office g'fillt hat, und wie sei term uf war hat er sei name gechanged zu Fill-no-more, und der

FRANKLIN PIERCE

hat uf sich g'nomma die grosse questions zu solva. Im North wora die liet gaega slavery, und im South wora sie in favor fon slavery. Alle Staat das admit sei hat wella zu die Union is erscht g'frogt worra, eb sie slavery wella oder net, und wie Kansas and Nebraska an die dier gelubt hen fer admittance, is der erscht genuine Kansas cyclone g'schaea in Congress. In derer unruhigkeit hat der Pierce sei grip gepacht und is fort. Der

JAMES BUCHANAN

hat sei hand broviert an President acta. Er war en Pennsylvanier, avver er hat ken Deutsch blut in sich g'hat. Er war aw so grumbehnig das es

ihn schwach g'mach hat und wie die gross question for ihn g'schtellt is worra hat er g'sad, "Ach, was kann ich duh?" Now, fer em Jim zu weisa was er duh kennt wann er wet, hat der John Brown der arsenal an Harpers Ferry g'nomma, und hat helfa wella die naeger frei macha. Avver die Staat soldata hen ihn g'fanga, und er is g'hunga worra fer hoch treason. Sei carper now leid ferwesend im grab, avver sei geischt maercht als noch fort. Now hat die South sich ab g'hunga fon der North.

Der Jim Buchanan hat nix duh kenna fer es Union zu maintaina. Die leit wora all froh wie sei term uf war, und er war froh sei sitz zum

ABRAHAM LINCOLN

gevva. Now wie der Lincoln elect war hen die Southern Staata sich georganized und der Jeff Davis als President elect. Sie hen aw grad aug'fang fechta an Fort Sumpter. Der Major Anderson war im fort mit achtzig man. Der Jeff Davis hat now der General Beauregard nunner g'schickt mit fier dausend man, em Anderson die knep reiva. Der Anderson hat alles geduldich aug'nomma fer fier und dreisich schtund, noh hat er surrendered. Die South het doh sehna kenna das sie die North net leddera kann. Wann es fier dausand man fier und



Der General Grant Trained die Armee

dreisich schtund nemmt fer achtzig man zu hocka, wie lang werd es die gans South nemma fer die gans North zu hocka? Des war die question, avver der Jeff Davis war nie net gute an figgers.

Now hat der Lincoln g'rufa fer soldata, und hat sie aw grickt. Die zwae armee, North und South, sin tzamma kumma an Bull Run. Nach em fecht sin die zwae armee g'schprunga—die South nach die North.

Der General McClellan war am head fom armee fom Potomac, und der General Grant war drunner in Tennessee und Kentucky, wo er Kentucky, aesel getrained hat fer service.

Die armee fom Potomac hat schlecht glick g'hat. Sie hen fiel fechta missa, und ken general hat schticka wella. Nach em McClellan hat der Burnside command g'numma; und nach em Burnside hat der Hooker der job grickt.

Ivver em gansa South war nix als fechta. Uf em wasser hen sie aw g'fochta. Die South hat en schiff g'hat so gross als Noah's Ark. Now hat die North en kase box grickt und e' paar man nei geduh und naus g'schickt fer der gross schiff zu hocka. Wie der kase box der ark g'fanga hat, hat aens fon der menner naus g'langt, und

mit der fauscht en lch in der ark g'schlagu, und der ark is g'sunga.

Uf der 1st January, 1863, hat der Lincoln declared das all die naeger im land frei sin, except die weisa das in der bresent sin. Er hat aw der General Meade im Hooker sein blatz geduh. Der Meade hat sacha so haes g'macht fer der Lee das der Lee nuf nach em north pole geh hat wella sich ab zu kiela. Avver an Gettysburg hat der Meade ihn widder g'fanga und es hat der Meade drei tag g'nomma fer der Lee zu convinca das er kalt fangt wann er dort nuf geht. Der Lee is noh widder South ganga und der Meade is ihm nach yuscht fer ihm company zu halta.

Ivver all sin die rebels g'leddert worra, und ebmohls hen sie die Federalists aw g'leddert. Now hat der General Grant command g'nomma fom grossa armee, und hat sich an Petersburg und Richmond uf g'halta. Doh hat der Captain Mike Heckhauf en goverment aesel g'schtola und ferkaufte fer sei luh aus em goverment zu griega. (Nach em greek hat der Mike en pension und en township office grickt als en reward fer gutie services.)

Now war die South so gute als g'leddert, avver der Lincoln hat g'wist das sei aus g'worena



Die Drei Monat Soldata Settla der Greek

soldata ken schacner finish druf duh kenna, so hat er die drei monat soldata raus g'rufa. Sie sin kumma und hen sich so wiedich forg'schtellt (in camp an Washington) das der Lee ferschrocka is und uf der 9th April, 1865, hat er surrendered zum Grant.

Die Union war now preserved, gross dank zu die drei monat soldata; und der Jeff Davis is fort g'schprunga. Avver drunner South, weit, weit fon haem und freind is er g'fanga worra. Er war uf ge'dresst wie an alte frau, avver er hat fergessa sei whiskers zu schaefa.

Deweil die North yubelirt hat ivver ihra sieg ivverem South is der President Lincoln g'schossa worra; Der John Wilkes Booth hat es geduh, und wie die officers ihm hach wora is er aw g'schossa worra. Nach em Lincoln seim todt hat der

ANDREW JOHNSON

sei blatz g'nomma. Der Johnson war en schneider bei handwork, und hat g'maent er kan Congress aus en job scheida. Im Johnson seiner zeit, wie alleweil, war Congress ordlich tzae, und der Johnson hat schier gar sei schare ferbrocha. Doh hat der Johnson aus g'funna das der President net en koenig is und is aw net

es gans government. (Fermarickt des dir yunga kerls wo gern e' tag President sei wet.)

Mit em graeschta dael fom druvel ferbei, und der Johnson aus em White House is der

ULYSSES S. GRANT

nei ganga schmoka und die bisniss duh. Der Grant hat die hend full g'hat mit Centennial runna und Insching fehta. Der General Custer war em Grant sei proxy in dem fecht, und der greek hat g'halta bis der Sitting Bull und der Narrish Gaul nuf nach Canada gezoga sin. Der Grant, nach dem das sei term uf war, hat en trip um die welt rum g'macht fer aus finna eb die United States die gans welt is oder eb es noch meh laender hat. Der

RUTHERFORD B. HAYES

war der naechst President. Es erscht ding das er geduh hat war es White House zu fumigata, der g'schmach fom Grant seiner cigars raus griega. Der Hayes war der aensig President das net elect war bei die leit. En special Commission hat ihn elect. In derer zeit hen die Chinese aug'fanga doh rivver kumma. Nach em Hayes is der

JAMES A. GARFIELD

elect worra. Er war en guter man und hat insist uf duk was recht is, und deshalb is er g'shossa worra und is g'schtorva. Der

CHESTER A. ARTHUR

hat noh die bisniss uf g'nomma und weil bisniss net brisk war hat er zeit g'hat fer im land rum schpringa und centennial exhibitions sehna. Die letschta sex Presidents wora all Republicans, und now wie em Arthur sie zeit uf war sin die Republicans zurick g'schtonna und hen die Demagrata en chance gevva. Der Demagratish hahna hat gegraet, und der

GROVER CLEVELAND

war elect. Der Grov war en alter "bach," avver nach dem das er President war hat es ihn net lang g'nomma en frau griega. G'hiert laeva war neu zu ihm, und er war lieber bei die "mam" g'sitzt wie in sein office. So hat er die bisniss walta g'lost, und eb sei lieb-traum ferbei war hat er g'sehna das die leit der

BENJAMIN HARRISON

in sein blatz elect hen. Der Benj war en guter President, und hat lessons g'nomma g'hat fon sein grossdawdy, der Bill Hen Tippecanoe




Der Benj Harrison Halt Schule

Harrison. Die lessons hat er runner g'hand zu seim grosskind, der Baby McKee. Now wella mir gern sehna eb der Baby aw noch President werd. Es war net fiel g'wonna im Harrison seiner election so hen die leit em.

GROVER CLEVELAND

widder en chance gevva fer sich en grosser name macha. Er hat now die tariff rates nunner geduh so das all die schaffleit en vacation grickt hen. Er selvert is ganga wildie enda schiessa an Buzzard's Bay, und wie er schpot haem kumme is e' nacht hat es die Fraulein Cleveland so ferzernt das sie ganga is und hat die Woman's Christian Temperance Union gejoined. Er hat aw lieb macha wella mit die Koenigin Lillioukilani fon Hawaii. Mir hen all gute g'fielt, und der General Jake Coxey hat all die tramps im land g'samelt fer nach Washington geh der Cleveland congratulata und ihra shoe uf em grass im White House hoff butza. Wie die armee nach Washington kumma is, hat der Cleveland die police force naus g'schickt sie zu bewilcoma. Die staat hat die tramps e' paar tag entertained und noh frei g'lost uf die condition das sie so weit aweg fon die staat gehn als sie geh kenna.



Der Cleveland Duht die Bisniss

Der Cleveland hat g'selma das es net dawert is
broviera fer noch en term, so hat er der

WILLIAM MCKINLEY

in der White House ziega g'lost. Der Bill hat
now der tariff widder g'raised und die leit sin
widder all an die arvet. In unserm land hen
mir ruhige zeita g'hat, avver drumma in Cuba
hen die Spanishe "jack" uf gedreht. Der Mc-



Die Spanishe Laufa Spanish

Kinley hat nix g'sad bis die Spanishe des land
ordlich hart gedruffa hen, noh hat er en
armee nach Cuba g'schickt. Wie unser soldata
nunner kumma sin hen sie die Spanishe am
hinnera watchasack fescht g'nomma und span-
ish laufa g'macht. Es war avver glei ferbei,
und die Gottin der Freiheit regiert net yuscht in

dem land, avver aw in Cuba. Der McKinley war en guter President und hat aw dafor leida misssa. Er is g'schossa worra, und nach seim todt is der

THEODORE ROOSEVELT

uf der schtool. Der Ted scheint en guter kerl zu sei, ennyhow so weit. Er hat em Monroe sie alter trespass notice widder uf getackt, und is naus West ganga bearra schiessa. Mir laeva doh in frieda und freiheit so lang das mir unser tax betzahla und bleiva aus der bresent.

ZUM BESCHLUSS

Des Land hat Wunnerfull Forschrift G'macht—
Grosse Inventions Macha Arvet Leicht—
Unser Gross Gelegenheit.

IN DERER zeit zeita em Freiheit Greek, hat des
land wunnerfull forschritt g'macht. Yankee
hern sin immer busy schtudya wie sie reich kenna
warra, ohne fiel arvet duh. Der result fon dem
is das es land so foll grosse inventions is—
machina und so dergleichen—das mir nix meh by
hand macha. Mir duhn all machina macha oder
runna fer ebbes schunscht zu macha. Und
wer net an dem schafft is entweder en tramp, en
gebuster sport, oder en bank cashier.

Der schteam inchine is en English invention,
avver der riggleweg und schteamboat sin
Americanish. Mir hen die graeshta rigglewege
in die welt, und of course, die haechste "ship-
ping" rates, weil die stockholders all orme (?)
menner sin.

In dem land hat electricity es haechst development erreicht. Der Benj Franklin is als naus in en g'widder raega und hat es fon die wolka gezoga und gebottled. Die leit hen net g'wist wie es zu usa, und em Franklin sei sales wora so wenig das er aus die bisniss ganga is.

Der Morse war der naechst das g'monkeyed hat mit electricity, und hat des telegraph invent.

Der telephone is aw doh, womit mir unser friend beleidicha oder ferflucha kenna und breicha net ferricha das mir en blo aug griega.

Now usa mir electricity fer machina, street cars und automobileels runna, fer leit todt macha, fer hitz und licht, und fer in die leit ihra mauga sehna auszufinna wie fler Insching bitters sie gedrunka hen.

Unser gebeier sin aw die graeschte in der welt. In dem broviera die leit der alt tower fon Babel zu bieta. Sie sin so hoch, mir brauch yuscht en glaener jump fom dach nemma und mir kummt in der himmel.

Alleweil sin e' paar Yankees am schoffa fer an machine mocha womit man fliega kann. Ich glab net das sie succeeda, fer fliegel sin net fer menscha in derer welt. Es geheret unser zu warta bis Gott uns haem ruft, und wann mir wertig sin griega mir fliegel.



Der Franklin Fangt Electricity

Es bescht ding in dem land is das en yeders en chance hat President zu sei. Alles das naetig is President zu warra is in dem land gebora zu sei und en grosser sock foll gelt und die recht political backing zu havva. Die chance is uf zu all unser citizens, except editors, poets und schreiver fon Deutsche schticker.

DAS ENDE.